

Ittoqqortoormiini umiarsualivissamik nutaamik Naalakkersuisut kingusinnerpaamik UKA2026-mut sanaartornissamut pilersaarusiornissamut (projektering) peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq, Mette Arqe-Hammecken)

Akissuteqaat

(Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisoq)

Aappassaanneerpeqarnera

Naalakkersuisut sinnerlugit Sanaartornermut Ataatsimiititaliaq peqqissaartumik isumaliutissiissusiorneranut qutsavigaara.

Ataatsimiititaliamit oqaaseqaatigineqarpoq, umiarsualivik nutaaq annertuumik pilersuinermi isumannaassutsimut nukittortitsissasoq, aalisartunut piniartunullu atugassarititaasunut pitsaanerulersitsissasoq, kiisalu inuussutitik ineriartortitsinissamut takornariaqarnermullu sinaakkusiussanik pitsaanerulersitsissasoq.

Naalakkersuisunit allannguutissatut siunnersuut saqqummiunneqartoq aalajangiiffigisassanngorlugu ataatsimiititaliap inassutigigaat iluarisimaarlugu paasivarput.

Nutaamik umiarsualiviliorneq sanaartugaavoq annertoq. Taamaattumik Naalakkersuisunit naliliinerput malillugu Ittoqqortoormiini innuttaasut akuutilluarneqarneranni isumannaatsumik tunngaviliinissarput pingaaruteqarpoq. Ataatsimiititaliap erseqqissaatigisaatut atuisunik misissuinerup pisariaqartitanillu misissueqqissaarnerup ataatsimoortinneqarnissaat umiarsualivimmik pitsaanerpaamik, najukkami inuiaqatigiinnut iluaqutaasumik sananissamut aallartiffissatut eqqorluinnartussaasoq.

Tamanna kinguaattoornerunngilaq, kisiannili pilersaarusiornissamut tunngavissatut pisariaqartuulluni. Inissiiffissamik pitsaanerpaamik suliasanillu eqqortumik, najukkami inuiaqatigiinnut teknikkikkullu pisariaqartitanut iluaqutaanerpaasumik nassaarnissatsinnut qulakkeeriffiussaag.

Naalakkersuisunit ataatsimiititaliami pilersitsiviusumik oqallittoqarsimaneranut qujavugut. Maanna siumut ingerlasinnaalernerput, aammalu Ittoqqortoormiini pissutsinik pitsannguinnissamut tunngavissanik qulakkeerinnissimanerput iluarisimaarnarpoq.

Taamatut naatsumik oqaaseqarluta, Naalakkersuisunit allannguutissatut siunnersuut aalajangiiffigineqassasoq inassutigaarput.